

EPESAS

Kipihac wê Pol kivuu vô tibii

Epesas ge

¹ A, Pol wê Anutu vînoo a ya xovôên wê ici va vông ge ên nêb a tu Yesu Kîlisi nu sinale ti. A kivuu kiyang tiga vô xam Epesas wê xam tu Anutu nue di xam vông i vin Yesu Kîlisi ge.

² Mag Anutu yuu Apumtau Yesu Kîlisi, yuu i vông vizid nivîha hixôn kiyang malehe i lam dô hixôn xam.

Anutu vông vizid nivîha vô il

³ Il ob pimil Anutu wê il lig Apumtau Yesu Kîlisi ma yuu Anutu. Il tu Kîlisi nue, om Anutu vông vizid kisii ganê vîhati vô il ên nêb he i ngîdu il xôn.

⁴ Taxlee ilage wê Anutu gên o tung lag yuu kibun lêm ge od vînoo il pyap lec yuac wê Kîlisi ob vông ge ên nêb il tu xomxo ngîbua wê nîpân ti ob yêp vô il lêm ge.

⁵ Anutu xêyaa vin lec il, om ilage ici va vînoo il pyap ên nêb il tu i nue lec yuac wê Yesu Kîlisi vông ge. Anutu vông bêge ya xovôên wê ici va vông ge.

⁶ Om il ob pimil Anutu ên vizid nivîha yang wê vông pileva vô il ge. Anutu vông vizid tige vô il lec yuac wê nu tuc vông vô il ge. Anutu xêyaa vin lec nu tuc.

⁷ Anutu xo vîgwe pîsiv ên il luu vêl, om vô il vêl ên il nêd nîpaên ya Yesu hi dî kîtya il nêd nîpaên vêl.

⁸ Om wê xo vîgwe pîsiv ên il ge, ge vizid nivîha wê Anutu vông i lam hîvun il xôn, dî Anutu vông pîyôp hîxôn xovôên vîhati vô il.

⁹ Ilage Anutu xovô yuac wê Kîlisi ob vông ge, lêc yuac tige yêp xôpacên vô Anutu vaci. Dêc tîmuên lêc Anutu vông i tîyi xovôên wê yêp vô i ge om hîlung xovôên tige lam yêp seac vô il ên nêb il xovô.

¹⁰ Xovôên wê yêp vô Anutu ge bêga nêbê buc wê Anutu vînoo pyap ge od obêc kîtuc xomxo hîxôn susu vîhati wê dô lec kibun dî wê dô vac lag ge lam dô vac Kîlisi kwa ngîbi dî i ob tu he nêb bazub.

¹¹ Anutu vông ya xovôên wê i vông ge om vînoo il ên nêb il tu i nue lec yuac wê Kîlisi vông ge. Ên Anutu obêc nêl kîyang ti ge od obêc vông i vô nôn lec tîyi xocbê kîyang wê yêp ilage.

¹² Anutu vông xolac mug lec xe Yuda taxlee dî vînoo xe ên nêb xe pîmil Anutu wê xêseac kehe ge.

¹³ Xam êno, xam ngô Anutu kîyang nôn. Kîyang tige kîyang nivîha wê nêl bêga ên nêbê Kîlisi vô il vêl ên il nêd nîpaên. Xam ngô dî vông i vîn Kîlisi dî tu i nue, om Anutu vông i tîyi kîyang wê hîlu pyap ilage dî vông Myakîlôhô Ngîbua lam dô vac xam nîlôm tîyi xocbê Anutu vînoo xam pyap.

¹⁴ Myakîlôhô Ngîbua dô vac il nîlôd, om vông xovôên vô il bêga nêbê Anutu ob kô il mî il la dô hîxôn i. Dî Myakîlôhô Ngîbua obêc dô vac il

nilôd di i loc tyip lec buc timuên wê il ob la vô Anutu ge di ob sea il lêm. Om il ob xovô vizid wê Anutu vông vô il ge di pîmil i lê i vô levac.

Pol kitaa vô Anutu ên nêbê i vông xovôên vô tibii Epesas

¹⁵ A ngô wê xam vông i vin Apumtau Yesu di xam xêmyaa vin lec xomxo vông vinên vihati ge,

¹⁶ om a pîmil Anutu tiyi buc vihati ên xam di a o sea lêm, di a mi kitaa vô Anutu ên a nêb i ngidu xam xôn.

¹⁷ Anutu ge il Apumtau Yesu Kilisi Anutu i di il Mag wê xêseac kehe ge. Om a kitaa vô Anutu ên a nêbê i vông xovôên nivihha wê i vông ge vô xam di nêl i kiyang kehe i yêp seac vô xam ên xam ngô di xovô Anutu.

¹⁸ A kitaa ên a nêb Anutu i vông xam piyôp i yêp seac ên xam xovô nôn nivihha wê Anutu nêl ên nêb obêc vông vô xam ge, di xam xovô vizid nivihha vihati wê Anutu nêl xam lêm lec pyap mi i dô bin xam wê xam tu i nue ge.

¹⁹ Di a kitaa vô Anutu ên a nêbê i vông xovôên vô xam ên xam xovô bêga bê xêkizêc wê Anutu vông ge i ngidu il wê il vông i vin ge xôn. Xêkizêc wê Anutu vông ge luu xêkizêc vihati vêl, om il o tiyi wê il ob yaxên mi xovô ge lêm. Xêkizêc levac tige vông yuac vac il nilôd,

²⁰ di Anutu tipi vô Kilisi kidi lec maviha vac yibên ya xêkizêc tige di vông i la dô vô Anutu vigê hiyôv gê kisii ganê.

²¹ Mêgem gwêbaga Kilisi tu levac mi nginoo xomxo levac kibun ga vêl, di nginoo angela hixôn vimwo nipaên vihati vêl, di nginoo susu

hixôn xomxo vîhati vêl, di kô lê levac di nginoo xomxo lê levac vîhati vêl, he wê dô gwêbaga hixôn he wê ob dô timuên ge.

²² Anutu vông xomxo yuu susu vîhati la dô vac Kîlisi kwa ngibi, di vông Kîlisi tu xomxo vông vinên vîhati bazub.

²³ Kîlisi hixôn xomxo vông vinên vîhati tiyi xocbê nôn tîbed, lêc Kîlisi tu bazub. Di Kîlisi viyum xomxo hixôn susu vîhati xôn di ici va tiyi lec vîhati, di i dô vac xomxo vông vinên vîhati nilô hixôn.

2

Anutu tîpi vô il dô madviha hixôn Kîlisi

¹ Ilage xam mi vông môm nîpâên yuu soên viyang viyang ge, mêgem xam dô tiyi xocbê xam wib di la dô teva ên Anutu.

² Vô buc tîgee xam la dô vac môm kibun ga, di timu vô môm wê Seten vông ge. Seten ge wê tu vimwo nîpâên vîhati nêen levac, di gwêbaga i vông yuac vac he wê pwoo Anutu kiyang vac ge nilô.

³ Ilage il vîhati dô tiyi xocbê xomxo tibêgee di timu vô môm nîpâên kibun ga, di vông môm nîpâên tiyi xocbê il nilôd kidu il ên nêb il vông ge, di il vông môm nîpâên tiyi xocbê il nidnivi yuu piyôp xovô ên nêb il vông ge. Om Anutu xêyaa vô myavinê vô il hixôn xomxo nîpâên vîhati ên nêb obêc kitya il vêl.

⁴⁻⁵ Ilage môm nîpâên wê il vông ge vông il dô teva ên Anutu tiyi xocbê il xib. Lêc Anutu xo vigwe pisiv ên il luu vêl, di xêyaa vin lec il luu il nêd nîpâên vêl, om vông il dô madviha hixôn

Kilisi. Môm tived wê Anutu xo vîgwe pisiv ên il ge, ge wê vô il vêl ên il nêd nipaên.

⁶ Anutu tipî vô il kidi lec madviha hixôn Kilisi di il tu Kilisi xe, om vông il lêd vô levac hixôn Yesu Kilisi gê kisii ganê.

⁷ Anutu vông bêge ên nêb xomxo vihati wê dô gwêbaga hixôn he wê obêc dô timuên ge, he i xovô bêga bê Anutu vông vizid nivîha vô il. Vizid nivîha tige bêga nêbê Anutu xo vîgwe pisiv ên il di vông Yesu Kilisi lam vô il vêl ên il nêd nipaên. Om vizid nivîha tige luu vizid vihati yang vêl.

⁸ Il vông i vin Kilisi om Anutu xo vîgwe pisiv ên il di vô il vêl ên il nêd nipaên. Lêc Anutu o vông vizid tige vô il ên môm nivîha ti wê il vông ge lêm. Nge, vông pileva vô il.

⁹ Ên il nêd yuac nivîha ti yêpên ma wê ob kisuu Anutu ên i kitya il nêd nipaên vêl ge. Om xomxo ti o tiyi wê ob yong i vô Anutu ge lêm.

¹⁰ Anutu vaci tung il vihati di vông il vô paha lec, lec yuac wê Kilisi vông ge, ên nêb il timu vô môm nivîha vihati wê i viac pyap ila ên nêb il ob la vac ge.

Kilisi kituc xomxo viyang yuu tu nôn tived

¹¹ Xam Epesas ge, xam o xomxo Yuda lêm. Nge, xam tibii ba. Xe Yuda, xe mi gôl nimnivi, ên môm tige wê Anutu vông vô xe Yuda ge. Om xe mi nêl kiyang lec xam bêga ên xe nêbê xam ge xomxo wê gôlên nimnivi ma ge. Om xam xovô bê ilage xam gên dô mamdiluhu.

¹² Vixôhilôg, ilage xam le teva ên Kilisi, di xam dô ninya ên xe Islel. Di Anutu hilu kiyang ên nêb obêc vông vizid nivîha vô xe Yuda, lêc o nêl

bêga vô xam tibii ba hixôn lêm. Xam dô kibun ga, léc xam o dô bin susu nivîha ti wê ob val vô xam timuên ge lêm, di xam lungên Anutu.

¹³ Ilage xam dô teva ên Anutu, léc Kîlisi lam yib di kîpyax i hi sea ên nêb ob didii xam lôm vô Anutu. Om gwêbaga xam lam dô kwabo vô Anutu lec yuac wê Yesu Kîlisi vông ge.

¹⁴ Ên Kîlisi vaci tu il nêd malehe kehe. Ilage xe Yuda hixôn xam tibii ba, il xêdyaa vô nîpân vîma. Om môp wê il xêdyaa vô nîpân vîma ge tiyi xocbê xenac levac ti wê le vac il mahîgun, om xe Yuda dô vîlu di xam tibii ba dô vîlu. Léc Yesu lam yib ên il vîhati, mêmegem dii xenac tige vêl di vông xe Yuda hixôn xam tibii ba il xôn dô kidu tîbed,

¹⁵ ên Yesu kitya Moses xolac hixôn kiyang yuu môp wê yêp vac ge vîhati vêl. Yesu vông bêge ên nêb ob kituc xe Yuda hixôn xam baba di vông il tu nôn paha tîbed, om vông il xêma nivîha mi dô vac kiyang malehe nîlô.

¹⁶ Yesu yib lec xax ên nêb ob vông il vîhati tu nôn tîbed di didii il xôn mi la vô Anutu. Om kitya môp wê il xêma nîpân ge vêl.

¹⁷ Kîlisi lam nêl kiyang nivîha vô il bêga nêbê ob vông il vîhati dô vac kiyang malehe nîlô. Om lam nêl kiyang bêge vô xam tibii ba wê ilage xam dô teva ên Anutu ge, di nêl vô xe Yuda wê xe dô kwabo vô Anutu ge hixôn.

¹⁸ Xe Yuda hixôn xam tibii ba ge, Myakîlôhî Ngîbua tîbed tax vuayen ên môp wê il xôn ob la vô Anutu ge lec Kîlisi tîbed.

¹⁹ Mêmegem gwêbaga xam o dô tiyi xocbê tibii ba wê vîtevac ge lêm. Nge, xam tu Anutu nue

pyap di lam kituc lec xe Yuda hixôn xomxo vông vinên vihati.

²⁰ Il vihati tiyi xocbê xumac wê Anutu lox ge. Om Yesu Kîlisi vaci tiyi xocbê teac wê le vac kibun di xumac le lec ge, di xe sinale hixôn plopete, xe tiyi xocbê xax wê le lec teac ge. Di xam ge tiyi xocbê xax malecên wê le lec pêt ngibi ge.

²¹ Di Yesu vaci ngidu xumac tige xôn, om xumac yêp nivîha di le xêkizêc. Anutu vaci lox xumac tige om obêc vô levac di tu Apumtau xumac ngîbua.

²² Xam êno vông i vin Yesu, om Anutu vilu vô il vihati dô tîbed om il xôn vihati tu Anutu xumac ngîbua wê Anutu hixôn Myakîlôhò Ngîbua ob dô vac ge.

3

Pol nêl xolac vô tîbii ba wê o Yuda lêm ge

¹ Anutu vông xe Yuda hixôn xam tîbii ba tu nôn tîbed. Lêc tîbii tung a Pol, a lam dô vac xumac kalabuhu ên wê a nêl Yesu Kîlisi xolac vô xam wê xam o Yuda lêm ge.

² A xovô ên a nêbê xam ngô kiyang lec wê Anutu vông vizid vô a ge. Anutu vông vizid vô a bêga nêbê a loc vô xam tîbii ba di nêl xêyaa vin lecên wê i vông ge kitong vô xam.

³ Ilage vizid wê Anutu vông ge yêp xôpacên. Mêd gwêbaga Anutu nêl mî i yêp seac vô a di a xovô. Om ga tiyi kiyang myabo wê a kivuu vô xam ilage.

⁴ Mêgem xam obêc kitong kipihac tiga od xam obêc xovô bê piyôp wê a vông ge nêl kiyang xôpacên lec Kìlisi yêp seac.

⁵ Vô buc taxlee ilage Anutu o nêl kiyang xôpacên tige yêp seac vô xomxo ti lêm, léc gwêbaga Anutu vông Myakilôhò Ngibua lam nêl kiyang tige kehe kitong vô xe sinale hixôn he plopete wê Anutu vînoo xe ên nêb xe vông i yuac ge.

⁶ Om kiyang tige bêga nêbê Anutu kituc xe hixôn xam tu nôn tibed pyap, om nôn nivîha vîhati wê Anutu nêb obêc vông vô xe Yuda ge od obêc vông vô xam êno hixôn. Dì kiyang vîhati wê Anutu hîlu ilage ên nêb obêc vô nôn lec vô xe Yuda ge, od kiyang tige obêc vô nôn lec vô xam baba hixôn, ên xam vông i vîn xolac nivîha wê Yesu Kìlisi vông ge.

⁷ Anutu vông vizid nivîha vô a dì vînoo a ên nêb a loc nêl xolac nivîha vô xam. Om vông xêkizêc wê i vông ge vô a ên nêb xêkizêc tige i ngîdu a xôn dì a vông yuac.

⁸ A ga, a o levac lêm. Nge, Anutu nue vîhati ge ngînoo a vêl. Mêlêc Anutu vông vizid nivîha vô a bêga nêbê a loc nêl xolac vô xam tibîi ba. Xolac tige nêl vizid nivîha vîhati wê Kìlisi vông ge kitong. Léc il piyôp o tiyi wê il ob xovô vîhati ge lêm.

⁹ Anutu ge wê tung susu lag yuu kibun vîhati, dì ilage môp wê Anutu nêb ob vông ge yêp xôpacên vac i piyôp dì i val tyip gwêbaga. Léc gwêbaga Anutu vông yuac vô a ên nêb a loc nêl kiyang xôpacên tige i yêp seac vô xomxo vîhati.

¹⁰ Anutu nêl kiyang xôpacên tige yêp seac vô

xomxo vông vinên vihati ên nêb he levac levac hixôn xêkizêc kisii ganê, he i yê di xovô bê Anutu piyôp levac luu vihati vêl.

¹¹ Buc taxlee ilage Anutu nêb ob vông yuac tibêge tiyi xocbê xo mi yêp lec Apumtau Yesu Kîlisi ên nêb Kîlisi ob vông ge.

¹² Mêgem gwêbaga il vông i vin Kîlisi, om Kîlisi vông môp vô il wê il ob la vô Anutu ge di il ob xona lêm.

¹³ Om a kitaa xam bê myavinê levac wê a kô ên wê a ngidu xam xôn ge, xam nilôm i o léc vô viyin ên myavinê tige lêm. Ên myavinê wê a kilê lec xam ge ob vông xam lêm vô levac.

Pol kitaa vô Anutu ên tibii Epesas

¹⁴ Mag Anutu kituc xe Yuda hixôn xam baba ge lam dô kidu tived, om a yev vixag kitu vô Mag di pimil i lê.

¹⁵ Anutu nêl lê tived lec he wê dô lag puunê gee hixôn il wê il dô kibun ga ge.

¹⁶ Om a kitaa vô Anutu bêga bê xêseac nivaha wê yêp vô i ge i lam ngidu xam xôn, di i vông Myakilôhô Ngibua wê i vông ge i dô vac xam nilôm di xam le xêkizêc ta.

¹⁷ Di a kitaa vô Anutu ên a nêbê i vông Kîlisi i lam dô vac xam nilôm ên wê xam vông i vin i ge, di i vông môp xêyaa vin lecên i vô levac vô xam ên xam le xêkizêc ya, i tiyi xocbê xax ngilôhô la vac kibun di hôm yatôv xôn di i le pilihî ge.

¹⁸ Ên xam obêc le xêkizêc vac môp xêyaa vin lecên ge od xam hixôn xe vông vinên vihati ge, il xôn obêc xovô môp xêyaa vin lecên wê Yesu

vông ge. Xêyaa vin lecên wê Yesu vông ge levac di dia nginoo la vêl di vîyum vîhati ge xôn,

¹⁹ di luu xovôên wê il vông ge vêl. Om a kitaa vô Anutu bêga bê i vông xovôên vô xam ên xam xovô xêyaa vin lecên wê Kilisi vông ge, di xêkizêc yuu xovôên di vizid nivîha vîhati wê Anutu vông ge i lam hivun xam xôn.

²⁰ Xêkizêc wê Anutu vông ge vông yuac vac il nilôd, om il obêc xo susu ti, me il obêc kitaa susu ti vô i ge od Anutu tiyi wê obêc vông vô il i luu wê il xovô me il kitaa vô i ge vêl.

²¹ Om il xomxo vông vinên vîhati, il wê il dô gwêbaga hixôn he wê ob dô timuên gee, il obêc pimil Anutu lec yuac wê Yesu Kilisi vông ge i yêp lûta lêc lûta. Kiyang nôn.

4

Il hixôn Kilisi tiyi xocbê nôn tîbed

¹ A ga, tibii tung a lam dô vac xumac kalabuhu ga ên wê a nêl Apumtau xolac vô xam ge. Ilage Anutu tyuc xam ên nêb xam tu i nue, om a ob nêl kiyang vô xam bêga bê xam viac môp vîhati i yêp nivîha i tiyi xocbê Anutu nêb il ob timu vô ge.

² Om môp nivîha wê Anutu vông vô il ge bêga nêbê xam pilepac xam di vô nipwo lec, di xam lum nêl kiyang vîma, di le i lêc vông nîpaên vô xomxo wê vông vîyin vô xam ge lêm. Nge, xam xêmyaa i vin lec lime di xam kilê vîyin wê he vông vô xam ge.

³ Môp malehe wê Myakilôhô Ngîbua vông ge kisuu il lec di vông il le nôn tîbed. Mêgem xam

vông yuac xêkizêc di hôm môm malehe xôn pîlihi ên i ngîdu xam xôn.

⁴ Il vîhati tu nôn tîbed, di Myakîlôhô Ngîbua tîbed, di Anutu tyuc il vîhati ên nêb il vông nîlôd i loc vô nôn tîbed wê i obêc vông vô il tîmuên ge.

⁵ Il Apumtau tîbed, di vông vinên wê il vông ge tîbed, di il lipac mia lec lê tîbed,

⁶ di il Mag Anutu tîbed. Anutu tu il vîhati nêd levac, di ngîdu il vîhati xôn, di dô vac il vîhati nîlôd.

⁷ Kîlisi tîtang vîzid toto ge vô il ya xovôên wê i vông ge ên nêb ob vông vô il.

⁸ Mêgem kiyang wê yêp vac kipihac xolac ge vô nôn lec. Kiyang tige nêl bêga ên nêbê,
 “Buc wê i lec mi lax kîsii ganê ge od didii tîbii wê vông vevac vô i lêc i ngînoo he vêl ge mi la hîxôn, dêc tîtang vîzid toto vô xomxo.”

⁹ Kiyang nêl bêge, om bo ti wê nêbê lec mi la kîsii ganê ge, kehe nêbê va? Kehe nêl bêga ên nêbê ilage i sea ben lag kîsii ganê di lop mi lam kibun ga di la vac kibun nîlô.

¹⁰ Om xomxo tyo wê lop mi lam kibun ga ge wê lec mi lax kîsii ganê tîi vac nang di luu lag vêl, om dô i nêx lec lag yuu kibun vîhati.

¹¹ Di Kîlisi vông vîzid yuu xovôên toto vô xomxo ên nêb he i vông he yuac ya. Om vông yuac sinale vô xomxo ya, di vông yuac plopete vô xomxo ya, di vông yuac xolac nêlên vô xomxo ya ên nêb he i loc nêl xolac vô tîbii madîluhu, di vông yuac pasto vô xomxo ya ên nêb he i viac xomxo vông vinên di tîxuu he ya xolac.

¹² Kîlisi vông yuac tîgee vô xomxo ya ên nêb he i ngîdu il xomxo vông vinên vîhati xôn di il

vông yuac wê Kîlisi vông vô il ge i yêp nivîha. Il hixôn Kîlisi tiyi xocbê nôn tîbed. Om yuac wê il vông ge ob vông nôn tige vô levac di ngidu vông vinên wê il vông ge xôn.

¹³ Mêgem yuac tige i vô levac vô il di i loc vô buc wê il xomxo vông vinên vihati obêc le xêkizêc vac vông vinên, di kô xovôên tîbed lec Anutu nu tuc, di il ob tu xomxo nivîha tiyi xocbê Kîlisi ge.

¹⁴ Mêgem il ob dô tiyi xocbê nue nipwopwo ge lêm. Ên xomxo kityooên obêc tixuu nipwo ya xolac ba ti, me didii he mi la vac môp kityooên ge od ob vô pilepac pilepac vô he tiyi xocbê gwec vuac di pilepac dipac di lea vô pop pop vô dipac la di lôm ge. Om il ob dô tiyi xocbê nipwopwo tibêgee lêm.

¹⁵ Nge, il ob dô tiyi xocbê xomxo levac di nêl kiyang hixôn nôn voma di xêdyaa i vin lecma, ên il obêc timu vô môp tibêgee ge od il ob le pîlihi hixôn Kîlisi wê tu il badzub ge.

¹⁶ Il hixôn Kîlisi tiyi xocbê nôn tîbed, lêc Kîlisi tu bazub di il ge tiyi xocbê vîxa yuu vigê di manôn yuubê. Di bazub vông ngang vihati kitucma di tu nôn tîbed. Om ngang toto obêc vông he yuac toto nivîha ge od nôn tige ob dô nivîha di lig mi vô levac di ob vô xêkizêc lec ya môp xêyaa vin lecên.

Xomxo vông vinên ob tup vô môp paha

¹⁷ A ob nêl kiyang ti vô xam. A tu Apumtau manôn om a nêl xêkizêc vô xam bêga bê le i lêc vông môp i tiyi xocbê tibii madîluhu vông ge

lêm, ên he vông nilô la vô môp vaxvax wê nôn ti yêp vacên ma ge,

¹⁸ di mapitoc hivun he piyôp xôn. He lungên Anutu di he nêb he ob ngô kiyang nôn lêm, om he dô ninyawehe ên maviha dôên wê Anutu vông ge.

¹⁹ He ni o yoc ên môp nipaên wê he mi vông ge lêm. Nge, he vông he la diluhu vô môp yôdac vêx yuu vux, di he doma vô môp ningeac vihati.

²⁰ Mêlêc Kilisi o didii xam vac môp tibêgee lêm.

²¹ Nge, a xovô ên a nêbê ilage xam ngô kiyang lec Kilisi, di xomxo tixuu xam ya Yesu kiyang nôn.

²² Kiyang tige nêl bêga ên nêbê ilage xam mi timu vô môp nipaên wê xomxo ngwe vông ge, om kityoo xam di didii xam la vac môp nipaên wê xam nimnivi xovô ge. Lêc môp nipaên tige wê ob kitya xam vêl. Om xam sea môp wê xomxo nipaên tige vông ge i loc yêp xel.

²³ Di xam pilepac nilôm yuu piyôp i vô paha lec,

²⁴ di xam hôm môp wê xomxo paha ngwe vông ge lec. Môp wê xomxo tige vông ge ngibua di xêseac nôn tiyi xocbê Anutu vaci.

²⁵ Mêgem xam sea kiyang kityooên i loc yêp xel di nêl kiyang nôn vôma, ên il vihati tu nôn tixed pyap.

²⁶ Xam xêmyaa obêc vô myavinê vôma ge od xam viac xam, ên xêyaa myavinê i o lêc vông xam loc vac nipaên lêm. Di le i lêc dô hixôn xêyaa myavinê di hiyôv i hoo loc hixôn lêm,

²⁷ ên xam obêc tax vuayen vô Seten di i ob didii xam la vac môp nipaên.

²⁸ Xomxo wê mi vông yôdac vô xomxo ngwe susu ge i o lêc vun xomxo susu i tii vac lêm. Nge, ici va vigê i vông yuac nivîha êdêc kisuu susu lec di vông ya vô xomxo wê nêc susu maên ge.

²⁹ Le i lêc nêc kiyang nipaên lêm. Nge, xam nêc kiyang nivîha wê ob ngidu xomxo xôn ge ên i vô nivîha vô he wê ob ngô kiyang ge.

³⁰ Le i lêc vông viyin vô Myakîlôhông Ngibua wê Anutu vông ge lêm, ên Myakîlôhông Ngibua lam dô vac il nilôd tii xochê il tu Anutu nue om vông xovôen vô il bêga nêbê il ob la dô hixôn Anutu timuên.

³¹ Xam sea môp nipaên wê xam xêmyaa vô nipaên vô xomxo ngwe ge, di môp kunacmaên, di môp xêyaa myavinê, di môp higacên, di môp wê xam nêc kiyang nipaên lec xomxo ge, di sea môp nipaên vihati i loc yêp xel.

³² Xam vông nivîha vôngma di xo vigwe pisiv ênma, di xomxo ti obêc vông nipaên vô xam ge od xam kitya i nêc nipaên vêl i tii xochê Anutu kitya xam nêc nipaên vêl lec Yesu Kîlisi lê ge.

5

Il dô vac xêseac om il ob timu vô môp nivîha

¹ Anutu kitya xam nêc nipaên vêl di xêyaa vin lec xam, di xam tu i nue. Om a nêc vô xam bêga bê xam timu vô môp wê Anutu hîlung vô xam ge,

² di xam timu vô môp xêyaa vin lec maên i tii xochê Kîlisi wê xêyaa vin lec il om yib ên il nêc nipaên ge. Kîlisi vông ici va tu daa wê Anutu

yê nivihã ge, tiyi xocbê ilage xomxo si daa wê niviveã nivihã ge ên nêb Anutu i yê nivihã.

³ Le i léc timu vô môt yôdac vêx yuu vux ði môt ningeac lêm, ði xam o vông nilôm i loc vô susu vax vax lêm, ði le i léc keac lec môt nipaên tibêgee lêm. Ên il Anutu nue il, om o tiyi wê il ob nêl kiyang lec môt nipaên tibêgee lêm.

⁴ Le i léc nêl kiyang yôdac lecma lêm, ði le i léc nêl kiyang xêlila lec kiyang nipaên lêm, ði le i léc nêl kiyang vidaaên wê nôn maên ge lêm, ên kiyang tibêgee tiyiên ma, om xam sea i loc yêp xel ði xam pimil Anutu.

⁵ Xacxam va xovô pyap bêga bê xomxo wê vông môt yôdac vêx yuu vux ge, me vông môt ningeac, me vông nilô la vô susu vaxvax ge, he obêc la dô vac Anutu yuu Kilisi ben lêm. ði a nêl vô xam bê xomxo wê vông nilô la vô susu vaxvax ge, he tiyi xocbê he yev vixa kitu vô anutu kityoên.

⁶ Xam viac xam, ên xomxo kityoên obêc val nêl kiyang vidaaên vô xam ên nêb ob ðidii xam mi la vac môt nipaên ge od xam o léc ngô kiyang wê he vông ge lêm. Ên Anutu xêyaa vô myavinê vô xomxo wê pwoo i kiyang vac ði timu vô môt nipaên tibêgee.

⁷ Mêgem xam dô teva ên xomxo wê vông môt nipaên bêgee,

⁸ ên ilage xam dô vac mapitoc, léc gwêbaga xam tu Apumtau nue, om xam dô vac xêseac. Mêgem xam timu vô môt wê xomxo xêseac vông ge,

⁹ ên xomxo obêc dô vac xêseac ge od ob timu

vô môt nivihâ yuu bôbac di dô vac kiyang nôn hixôn.

¹⁰ Di xam myag môt wê Apumtau obêc yê nêb nivihâ ge.

¹¹ Xomxo wê mi dô vac mapitoc ge, he mi timu vô môt wê ob vô nôn nivihâ lêm ge, om le i léc timu vô he lêm. Nge, xam nêl he nêl nipaên kitong vô he.

¹² Léc a ob nêl kiyang lec môt wê he vông mi i yêp xôpacên ge lêm, ên ob vông ni yocên vô a.

¹³ Léc xêseac obêc linac lec môt yuu susu vihati ge od he ob dô seac di ti ob dô vac mapitoc lêm. Ên susu vihati wê xêseac tige linac lec ge, he tiyi xocbê xêseac nôl.

¹⁴ Mêgem kiyang ti yêp bêga ên nêbê,
 “Ông wê ông wêp ge, ông kidi lec mamvihâ di sea môt mayibên, ên xêseac wê Kilisi vông ge i linac vô ông.”

¹⁵ Om xam viac xam ên môt wê xam timu vô ge, di xam o léc dô i tiyi xomxo wê lungên Anutu ge lêm. Nge, xam dô i tiyi xocbê xomxo wê xovô Anutu ge,

¹⁶ di xam xovô môt nivihâ wê Anutu vông ge i tiyi buc vihati, di xam o sea buc ti i yêp vidaaên lêm, ên buc gwêbaga il dô vac viyin.

¹⁷ Mêgem xam o dô i tiyi xocbê xomxo wê piyôp maên ge lêm. Nge, xam xovô môt wê Anutu vông vô xam ên nêb xam timu vô ge.

¹⁸ Le i léc num mia xêkizêc di i vông xam piyôp i vô yacyac lêm, ên môt tibêge ob vông xam vô nipaên. Om xam sea môt tibêge di lam dô vac Myakilôhô Ngibua kwa ngibi ên i hivun xam xôn.

19 Om kiyang wê xam keac vôma ge, xam keac di vông lilo wê pimilên Anutu ge, hixôn lilo daa, di lilo wê Myakilôhô Ngibua vông vô xam ge, di xam vông lilo vô Apumtau vac myam di vông vac nilôm hixôn,

20 di i tiyi buc vihati xam pimil Anutu lec il lig Apumtau Yesu Kîlisi lê ên viyin yuu nivîha vihati wê val vô xam ge.

Kiyang lec môp iimaên

21 Xam pimil Kîlisi di kô i lec, di xam loc dô vac lime vông vinên kwa ngibi i tiyi xocbê môp wê Kîlisi hilung vô xam ge.

22 Xam vêx, xam ngô kiyang wê liyame nêl ge di loc vac he kwa ngibi i tiyi xocbê xam ngô Anutu kiyang di la vac i kwa ngibi ge,

23 ên liyame ge tu xam bamzub tiyi xocbê Kîlisi tu il wê il vông i vin ge badzub. Il hixôn Kîlisi tu nôn tibed, di Kîlisi vaci vô il vêl ên il nêd nipaên.

24 Il wê il vông i vin ge, il dô vac Kîlisi kwa ngibi, om xam vêx êno, xam loc vac kiyang wê liyame vông ge kwa ngibi i tiyi buc vihati.

25 Xam vux, xam xêmyaa i vin lec vinême i tiyi xocbê Kîlisi xêyaa vin lec il xomxo vông vinên vihati, om lam yib lec il nêd nipaên,

26 ên nêb ob lipac il vô paha lec ya mia hixôn xolac wê ici va vông ge, di vông il vông vinên vihati il tu i nue.

27 Kîlisi vông bêge ên nêb ob vông il tu xomxo nivîha wê ningec yuu byepacên ti me susu nipaên ti ob dô hixôn il lêm. Nge, il ob tu xomxo ngibua wê judaên ti ob yêp hixôn il lêm ge.

²⁸ Kìlisi vông bêge, mêgem xam vux, xam xêmyaa i vin lec vinême i tiyi xocbê xam xêmyaa vin lec xacxam va nimnivi ge. Vux ti xêyaa obêc vin lec vinê ge od tiyi xocbê xêyaa vin lec ici va,

²⁹ ên xomxo ti ob vông myavinê vô ici va ninivi lêm. Nge, ob vet ninivi di viac nivihha tiyi xocbê Kìlisi viac xomxo vông vinên vihati nivihha ge,

³⁰ ên il tiyi xocbê Kìlisi vixa yuu vigê di manôn yuubê, om il hixôn Kìlisi tiyi xocbê nôn tived.

³¹ Kiyang yêp vac xolac bêga nêbê,
 “Mêgem vux ti obêc kô vêx ge od ob sea ta yuu ma di la dô hixôn vinê, di yuu ob tu nôn tived.”

³² Xolac nêl bêge, lêc kiyang ga kehe yuu. Kehe ngwe wê levac ge nêl lec Kìlisi hixôn xomxo vông vinên.

³³ Di ngwe nêl lec môp wê vêx hixôn vux iimaên ge, om xam vux, xam toto xêmyaa i vin lec vinême i tiyi xocbê xam xêmyaa vin lec xacxam va nimnivi ge. Di xam vêx, xam pîmil liyame lê di kô he lec.

6

Kiyang lec nue hixôn tae mae

¹⁻² Xam nuge, xam tu Apumtau xe, om xam vô ninyam lehe vô tame mame kiyang, ên ge môp bôbac wê xolac nêl ilage bêga ên nêbê, “Xam hôm tame mame lê lec di ngô he kiyang.” Xolac tige Anutu hîlu taxlee bêga ên nêbê,

³ “Xam obêc vô ninyam lehe vô kiyang wê tame mame nêl ge od xam obêc dô nimvihha di

dô mamviha buc dia gê kibun ga.” Anutu nêl bêge ilage.

⁴ Xam mae, le i lêc kunac nume i luu vêl mi vông he xêyaa i vô myavinê vô xam lêm. Nge, xam viac he i nivîha di titô he di tixuu he ya Apumtau xolac.

Kiyang lec xomxo levac hixôn nue yuac

⁵ Xam wê xam tu xomxo levac nue yuac ge, xam loc vac kiyang wê xomxo levac vông ge kwa ngibi, di xona ên he di xam nilôm i o lêc vông yuu lêm. Nge, xam nilôm i loc tived vô yuac wê xam ob vông ge, di xam timu vô xomxo levac vya i tiyi xochê xam timu vô Kîlisi vya ge.

⁶ Le i lêc kityoo di hi xomxo levac manôn lec ya yuac lêm, ên ge tiyi xochê xam nêb xomxo i yê xam nivîha. Om xam vông xam yuac kibun ga i yêp nivîha i tiyi xochê xam vông yuac nivîha vô Kîlisi ge od ge tiyi xochê xam vông ya xovên wê Anutu vông ge.

⁷ Xam vông xam yuac kibun ga hixôn xêmyaa nivîha, di vông yuac vô xomxo kibun ga i tiyi xochê xam vông yuac vô Anutu.

⁸ Xam xovô bê xomxo ti obêc vông i yuac i yêp nivîha ge od Apumtau ob vông nôn nivîha vô i. Om Apumtau obêc vông nôn nivîha vô he wê tu xomxo levac nue yuac ge di ob vông vô he wê lê levac ge hixôn.

⁹ Xam xomxo levac wê xam viac nume yuac ge, xam vông nivîha vô nume yuac, di le i lêc hîgac di vông he i xona lêm, ên xam xovô bê Apumtau wê dô kisii ganê ge tu xam nêm levac di tu nume yuac nên levac êno, di Apumtau o yê il mangwe

levac di mangwe nipwo lêm. Nge, yê il vihati tiyima.

Susu vevac wê Anutu vông vô il ge

¹⁰ A ob nêl kiyang xêxuhu ya hixôn bêga bê xam tu Apumtau xe pyap, om xam le pîlihi ya xêkizêc wê Apumtau vông vô xam ge.

¹¹ Xam vînyum susu vevac wê Anutu vông vô xam ge lec xam nimnivi xôn di le xêkizêc di vông vevac vô Seten di pwoo kiyang kityooên wê i vông ge i pec.

¹² Ên il o vông vevac vô xomxo kibun ga lêm. Nge, il vông vevac vô vimwo nipaên hixôn angela nipaên di Seten he nue yuac hixôn xêkizêc levac wê viac mapitoc ge.

¹³ Om xam vînyum susu vevac wê Anutu vông vô xam ge lec xam nimnivi xôn, di buc nipaên wê Seten nêb obêc vông vevac vô xam ge od xam ob le xêkizêc vac vevac di ngînoo Seten vêl mi le pîlihi.

¹⁴ Mêgem xam le xêkizêc di vînyum susu vevac wê Anutu vông vô xam ge lec. Susu vevac tigeê bêga bê xam vêx Anutu kiyang nôn i tiyi xocbê let, di xam vînyum môp nivîha i kisuu xam lec i tiyi xocbê ngakwi xêkizêc wê kisuu xam pikopac lec ge.

¹⁵ Anutu xolac nivîha nêl ên nêbê Anutu vông il la dô vac kiyang malehe nilô, om xam nêl xolac tige mi le xêkizêc vac i tiyi xocbê su wê xam su lec vixam xôn ge.

¹⁶ Om xam vînyum susu vevac tigeê lec xam nimnivi xôn, di xam hôm vông vinên wê xam vông ge xôn pîlihi i tiyi xocbê êê wê kisuu xam

lec ge, êdêc Seten obêc byêx yii wê ngwax tum lec ge lam ge od i lam selac lec vông vinên wê xam vông ge di xam le nivihã.

¹⁷ Xam xovô pyap ên xam nêbê Anutu vô il vêl ên il nêd nipaên, om xam hêm xovôên tige xôn pilihi i tiyi xochêxam tung kilung xêkizêc ta lec bamzub ên nêb i kisuu bamzub lec ge. Xam hêm yipac levac wê Myakilôhô Ngibua vông ge. Yipac tige Anutu xolac nô.

¹⁸ Xam kitaa vô Anutu i tiyi buc vihati ya xêkizêc wê Myakilôhô Ngibua vông vô xam ge, di xam kitaa lec môp toto wê xam vông ge. Xam viac xam di hêm môp kitaaên xôn pilihi di seaên i ma, di xam kitaa lec xomxo vông vinên vihati ên Anutu i ngidu he xôn.

¹⁹ Di xam kitaa vô Anutu lec a êno bêga bê Anutu i ngidu a xôn ên a xonaên ên xomxo ti i ma di a myag i vô viyin maên di a nêl xolac wê yêp xôpacên ilage i yêp seac.

²⁰ A ga wê Anutu vông a la nêl xolac, om gwêbaga tibii tung a lam dô vac xumac kalabuhu ga ên wê a nêl xolac ge. Mêgem xam kitaa vô Anutu bêga bê i vông xêkizêc vô a ên a xonaên i ma di a nêl Anutu xolac vô xomxo vihati i tiyi xochê yuac wê Anutu vông vô a ge.

Kiyang viwen timuên

²¹ Tikikas ob nêl a kitong vô xam di nêl yuac wê a vông vac vigwe ga kitong êno. Tikikas ge il lig vông vinên ti wê il xêdyaa vin lec i ge, di i vông yuac nivihã vô Apumtau ge.

²² Om a vông i loc vô xam ên a nêb i loc nêl kitong bê xe dô tibêna vac xumac kalabuhu ga, ên i vông xam nêlôm i vô vîyin maên.

²³ Mag Anutu yuu Apumtau Yesu Kîlisi, yuu i vông kiyang malehe hixôn xêyaa vin lecên di vông vinên nôn i loc vô xam wê a lige ge.

²⁴ Vîzid nivîha wê Anutu vông ge i loc vô xomxo vîhati wê xêyaa vin lec il lig Apumtau Yesu Kîlisi tîyi buc vîhati di ob tîyôô vac lêm.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 18 Apr 2025 from source files dated 31 Aug 2023

3d2c844d-4bc8-590b-bbf2-3a5fcd1f7ad8